

明獻徵錄

五十四下



五十五欵

六十六

一五七	六三九	八九七	漢書門
冊	架	函	號類

六二	一五	八九	漢書
函	架	冊	號類

內閣文庫		
番號	漢	8987
冊數	157 (63)	
函號	287	153



都察院右副都御史朱英傳

淺黃實錄

都察院右副都御史朱英成化中總督兩廣軍務以
思威著名專事蓄積在鎮數年積金數萬計流移脇
從賴以復業全活不可勝紀子孫有勸自陳年勞及

軍功者則曰食報如是足矣歷官四十餘年清白之
操如一日廣人思之與葉盛韓雍陳選並祠學宮子
刑部郎中守孚請謚已得旨後以病卒不果正德十

三年御史范輅爲之申請追謚曰恭簡

太子少保都察院右都御史贈榮祿大夫太子

太保朱公英神道碑

劉珩

處行錄 卷之五 四
太子少保都察院右都御史朱公卒 上悼惜之遣
中使賜楮錫萬緡追贈榮祿大夫太子太保命禮官
諭祭繕部營葬域惟朱氏自廣州節度使世爲名家
其後以難徙郴州至公凡幾世公少孤嗜學喜談易
資志曠遠以明經領鄉薦與族兄克寬同登正統乙
丑進士第授監察御史閩浙亂 上簡才御史十三
員分守州縣公得處州比之郡大軍尚駐金華公欲
徑趨處州守鎮危之遣人遮留不聽竟冒險抵其所
公乃取道慶元榜示賊衆曉以禍福即時被虜老小
皆出附擒賊首周明松等若干人賊平召還京公條

處中民情五事皆報可外戚部 上全侵民產中官
善增地廣恃寵暴橫待林莊每公爲給事中公諷莊
敏等交章劾奏汪以外戚免產卽歸民而善姚竟下
獄景泰壬申秋名多官議易儲公偕莊敏力論不可
旣而泣下附時者頗忌之然終亦不能有加于公也
冬以公參議廣東布政司剛斷伏奸暴寬和綏良善
凡有便於民輒舉行之中官採珠南海督責太甚時
公掌司事甚憂之以爲兵乏民貧爲之奈何乃會巡
撫葉文莊公密奏召還民無擾一夕宿雷州分司夢
有人謂曰汝心白色我爲汝易之忽取出果白色乃

點以藥卽赤色復置內如故而去於乎異哉甲戌斗
峒賊首劉三仔等恃險屢作亂公厚撫諭之未幾擁
衆復劫掠公奮不顧身振揚士氣徑趨巢穴剪除無
遺類捷聞賜彩段寶鏹凡若干公雖以有功獲賞然
每遇幸亂邀功輩未嘗不反覆面折不少貸一時獲
脫血刃者以手加頰曰活我者朱公也天順辛巳潮
賊羅寧等流劫郡縣屢挫官軍公檄諸路兵大會賊
所卽時剿滅之其生俘脇從者或欲以爲功公曰此
良民也悉縱之是時軍中所獲被虜男婦數千人公
則置一營以處婦女人莫敢犯各使寧家捷聞復有

彩段寶鏹之賜以功陞右叅政丁內艱起復改陝西
土夷滿四叛寇固原官軍往討之以公總饋餉賊平
陞福建右布政使尋遷左復改陝西南載載陞都察
院右副都御史巡撫甘肅公拜命首陳安邊十事大
要欲練兵積穀興屯種柔諸番又陳處置邊夷十事
如徙居戎以消後患簡貢使以省邊儲類皆確論後
歲又陳八事如製衣裘以給墩軍之類 上皆嘉納
之以才能改兩廣總督軍務兼巡撫公於事無大小
一以持重爲務如昔叅議時而重輕加密一時喜功
生事者咸斂退而賊亦知化立山當大藤峽羣盜之

虞德金 卷之五十四
衝首惡獠獍李公主願嚮順公為請於朝置永安州
以其子世吏目餘黨悉為編民由是諸郡獠獍歸復
草業者踵相繼數年間所增戶四萬三千有奇口一
十有五萬他如韋諫誠潘萬蠻潘公添等皆乞降附
荔浦潯融間劇盜竟未服公以次芟除殄其渠魁餘
醜亦從治 上以優詔勞獎陞右都御史仍加從一
品俸會交人欲侵老搨地立營於龍州外境議者謂
將內寇朝廷詔諸鎮設備且詢公方略公奏云安南
藁爾小國不過與老搨龍州爭隙地耳志豈敢深犯
哉姑諭之彼當悔悟如不自量聲罪致討未晚也

上用公言交人果畏服修貢不絕既而公以衰老請
上不許以練達邊事軍民悅服褒之大司馬缺廷
臣首薦公 上以兩廣重地未可輕代當別舉久之
都察院長缺 上乃召公入尋加太子少保中外咸
稱愜乙巳元日星變公陳八事切中時宜 上皆允
行至是以疾不起時成化二十一年七月十二日也
鉅其生永樂丁酉得壽六十八子守孚乙丑進士任
刑部郎中次守順守謙次守蒙舉人公諱英字時傑
號澹菴更號誠菴又號任真子有澹菴紀年誠菴奏
稿任真子集若干卷藏于家

許至吳以燕不味却外二十一平上日十二日
繼進了日元日星變公刺入事世中却宜 土皆武
時察別身始 土代日公人華賦天子少計中伏
百首燕公 土以兩重重此未下陣升當限舉人
土不指以轉戰數事軍刃外則變之大同無類
土以公言交人果畏則對實不蘇而公以寒夢

資德大夫正治上卿都察院左都御史贈太子

太保謚恭簡戴公珊墓志銘 李東陽

都察院左都御史戴公既寢疾遺囑其從子兵馬副
指揮星曰不得以卹典累 朝廷已而禮部稽典制
以聞 上再賜諭祭令有司治葬事給驛護歸其喪
監察御史楊儀等數十人以公督學所造士合詞上
請特贈太子太保謚恭簡蓋於禮加隆焉公諱珊字
廷珍其先宋錢塘令士先自婺源徙浮梁祖諱嗣安
以子昇貴贈陝西布政司右叅議考諱嘒嘉興府學
教授皆以公貴累贈南京刑部尚書公以縣學生舉

天順壬午鄉貢甲申登進士第成化丙戌試四川道
監察御史服闋乃授職壬辰督學南畿凡考校必以
文藝占器識有請謁者孫不色拒而終一無所撓羣
士帖服至無後言戊戌遷陝西按察司副使仍專學
政政如南畿地加廣雖遐陬僻壤未嘗不到修古聖
賢祠廟或增秩祀典聞民間孝節事奏旌其門甲辰
擢浙江按察使令尚清肅丁未遷福建右布政使弘
治戊申轉左布政使勤教養通財賦情法兩當論治
體者必謂之已酉擢都察院右副都御史撫治鄖陽
諸府豪右多窟流聚爲利公刻日令首罪民所闢田

多匿稅略償所費而沒其餘嚴練兵伍自製爲營陣
法蜀盜野王剛越境入竹山平利諸縣守臣畏罪莫
敢發公請合湖陝兵誅其首惡縱其脇從千餘人事
遂定時偉其功公不自伐也辛亥 召入爲刑部右
侍郎乙卯轉左嘗會勘荆府不法事皆得實時羣疑
交訐 朝廷是公議卒行重典丙辰拜南京刑部尚
書讞獄尤謹庚申復 召爲左都御史公益自檢律
務持風紀雖書簿之細必極精覈嘗與吏部考察京
朝官者一考天下述職者再 孝宗皇帝親鞫大獄
諸司震悚公從容應對時有所開析 天威頓霽

上知公清慎每 廷宣面問至移晷刺引疾求退必
優詔勉留命醫賜食間有慰諭若家人父子然者公
不覺感泣 上亦爲之動容章前後六上留益力公
遣其妻若子先歸以身待命乙丑 新天子嗣位公
不敢輒言去力疾視事疾再作竟不起距其生正統
丁巳壽六十有九

戴公珊傳

雷禮

戴珊字廷珍江西饒州府浮河縣人天順甲申進士
自幼端亮有大志明性理之學務見於躬行成化二
年擢四川道監察御史廉慎公勤風紀截然八年奉

勅督南畿學校時士習頹靡多緣飾詩書以獵聲稱
珊正身率之凡考校必以文 占器識有請謁者遜
不色拒而終亦無所撓羣士帖服至無後言十四年
陞陝西按察司副使仍專學政政如南畿又修古聖
賢祠墓增秩祀典德教風行在陝久待諸士如家人
父子諸士亦愛慕不忘稱誦至今久之陞浙江按察
使秉公嚴正務崇大體一時僚貳分巡各道者人異
其見往往用已意出入於法珊虚心比之多所平反
其祇身無衆寡無大小俱中矩矚識者稱其端鯁雅
飾不負軒公輒云踰二年進福建右布政使轉左自

奉儉約無他者好退居惟焚香讀書而已於義利較
限尤嚴薪不可渝故終任不持閩中一物弘治二年
鄖陽撫治缺人太宰王端毅公恕素重其賢薦陞右
副都御史撫治其地時鄖陽諸府豪右多窟流聚爲
利乃刻日令首罪民所闕田多匿稅畧償所費而沒
其餘嚴練兵伍自製爲營陣法蜀盜野王剛嘯聚不
逞初起夔州新寧往來東鄉大寧大昌諸邑肆行劫
掠守土者莫能禁遂入湖廣竹山竹谿又據漢中金
州平利西鄉諸郡縣凡五年守臣畏罪莫敢發珊請
令四川湖陝三省調兵誅之 上下兵部議移檄三

省撫臣調兵進討珊檄副使朱漢等分道並進賊聞
風奔潰乃約川湖兵深入賊巢麻柳壩所向克捷於
庚戌十一月誅其首惡縱其餘黨千餘人事遂定踰
年辛亥召爲刑部右侍郎與尚書何文肅公喬新彭
惠安公韶俱以學行負時望相與同心一德期敬獄
以長我 國家於奏當之成務洗冤抑凡正人受禍
者雖忤 旨不避若大奸宿猾盤據不可動者苟法
所難宥屢請弗已也一時稱爲得人久之轉左命勘
荆府不法事廷可其議九年遷南京刑部尚書留都
私人奸法能詛是非珊慎三尺宣幽達滯皆犁然當

人心又雅重鎮定足爲士類典刑十三年召改左都御史掌院事益自檢律務持風紀雖簿書之細必極精覈嘗與吏部考察京朝官者一考天下述職官者再孝宗親鞠大獄諸司震悚珊從容應對時有所開析天威所霽上知其清慎每廷奏宣面問至晷刻疾求退必優詔勉留命醫賜食十八年己丑春召珊同兵部劉公大夏入各對畢上命中使出白金二錠以賜且面諭曰卿等將去買茶果用朕聞朝覲日文官避嫌有閉戶不與人接見者如卿等雖開門延客誰復以賄賂通也朕知卿等故有是賜

且命不必朝謝恐公卿知之未免各懷愧懼也後珊屢以老疾求退孝宗不允一日私懇於大夏曰珊老病子幼萬一客死異鄉地下不瞑目也公同年好友也受知于上獨不爲我一言乎一日上召大夏議事畢因問戴某近來何如劉言戴某有病累疏乞休出于實情伏望皇上憐而允之上曰彼教卿來奏乎劉曰戴某在告臣往視之彼恐微誠不能動天令臣見陛下日爲彼申達下情耳上曰卿去說與戴某朕以天下事推誠付托猶家人父子也太平未兆何忍捨朕先歸乎劉以上語告珊泣曰

吾不得返家矣未幾卒于官贈太子太保謚恭簡珊
 德性和粹中耿耿不苟合而洞達無城府奉職守法
 不為物撓而意嘗近厚祿仕四十餘年家無餘貲一
 意官守雖尊官高年猶削章牘辰入酉出窮寒暑不
 變敷歷中外所至有聲績學政尤著身既沒人至今
 道之不衰為時名臣云

資德大夫正治土卿都察院左都御史贈太子

少保謚簡肅張公敷華神道碑銘

李東陽

公姓張氏諱敷華字公實吉安安福人也譜傳為唐
 始興公九齡之裔南唐光州刺史紹始遷安福代有
 族望曾祖諱尚修祖諱若金贈監察御史累贈南京
 都察院右都御史考諱洪正統乙丑進士為監察御
 史預土木之難景泰初已死事恩廕公為國子生至
 孝宗朝以公貴贈南京兵部右侍郎追賜葬祭再
 贈如祖官母姚氏封孺人累贈至夫人公少負氣節

七歲時里社有竹木之祟公指麾羣兒斬伐殆盡十歲遭父喪哀痛幾絕既受廕益勤問學天順壬午京闈甲申登進士第時在憲宗朝簡入翰林爲吉士成化改元乙酉授兵部車駕主事累遷郎中多忤時貴或令邏者攬撫無所得乙未擢浙江布政司右叅議監溫處二府銀課景寧有礦盜聚至數千人鎮巡官議進兵公曰此可撫而定也乃刻日使自歸身往蒞之賊露刃以待及諦視曰果我張公也皆駢首聽命公執其首惡十二人餘悉宥之遷右叅政進右布政使屢斷疑獄均理徭役令邑里不足遞相繼

補民用少紓弘治改元戊申擢湖廣左布政使歲入饑給粟散粥藥病理死增價致賈遣使告糴大修學宮以備直資餓者所活不可勝計辛亥擢都察院右副都御史巡撫山西民攀留遮道至不得行道聞母喪癸丑服闋命仍舊任歲復歉奏暫增解池鹽課以補王府歲祿會霖雨躬禱于神池獨不壞歲給大同邊餉多困折納公請太原以北可通車者運米民亦便之乙卯改撫陝西禁婚娶勿論財喪葬不得舉樂有妖僧據山爲逆羣議恟恟兵部尚書馬公曰張公實在必有處分比報至則公已授計令父老生縛

之矣丙辰擢南京兵部右侍郎己未擢右都御史總督漕運兼巡撫江北諸府首黜武臣部運尤無良者權貴干請悉拒弗納近例漕司多假太倉官銀少免息利公謂逋負乃下剝上攘所致而官為借貸大非政體峻為之禁高郵諸湖隄久且壞公為深溝數道以緩湖水寶應地多平侈公趣令築隄成而水至辛酉改掌南院風紀一新乙丑遷南京刑部尚書尋召為左都御史掌內臺事公再俱疏辭優詔弗許請嚴天下有司貪酷奔競之禁會讞重獄有寵臣坐法或疑當末減公執不可卒從重議正德改元丙寅

有吉令致仕公即日上道歸葺祠廟修譜乘郵嫻族類且革猶衣冠揖家廟退終于正寢公風采凝重辨義利若白黑事有不可不曲為遷就進退得失未嘗一動其心遺命所屬猶謂不以悖貨為子孫累蓋至死不亂也為文典實不浮有介軒集并奏議若干卷藏於家公生正統己未卒於正德戊辰年七十訃聞贈太子少保謚簡肅遣官諭祭命有司治塋事初公為庶吉士李文達彭文憲二公欲留官翰林公與劉東山時雍力辭不就後二公皆以政事為名臣及公入內臺值逆瑾竊柄旋致廢棄廷諭之辭忽

林留不獨

從中降公名乃在尚書之列暨于身後贈官賜謚卹典隆厚一無少愆於是天下曉然知曩昔之事非聖明本意而公論之終不可揜也

張簡肅公傳

羅洪先

國家當盛治之時必有維持培植之人生乎其間其博厚純實剛介平恕若出於天性而不可已未嘗有矯戾眩飾纖靡慘薄之態入於見聞是以朝廷刑賞簡當公議清明天下趨向咸歸一時君子恃之得以無恐譬之少壯之年元氣充滿起居以時嗜好有節自足以凝精而握固不待服食導引之外助嗚呼此

其所係如何哉某數歲有知聞先大夫與客談皆弘治時事且謂當時六卿大臣江右有安成張公浮梁戴公二公行事酷類古人至若剛嚴難犯張公又其最也我朝政在內閣士之始進以翰林爲極選而競進者率規計恐後公與華容劉公堅避不往且曰願就部曹習聞民事爲國家建勲業甚幸沒沒徒老文字竊所恥也於是自兵部郎中出爲浙湖兩藩擢副都御史巡撫山陝進尚書都御史掌院事歷仕凡四十年所在咸有樹立縉紳之間倚以爲重其後闡瑾用事憚公執瀆相尼一日假內帑促令致仕公去

而紀綱廢矣悲夫公致仕時瑾遣人道偵之禁假官
舟且不得與有司見公乘敝艇至徐州洪觸石敗漏
適先大夫以工部治洪夜且半聞扣署聲問之知爲
公也於是密往慰勞時寒甚衣盡濡乃解裳治具相
授鷄且鳴易所乘便舟以行臨發公慨然曰吾受
先帝厚恩恨莫能報賴君復生吾有孫當以今夕事
語之必且遂吾志也先大父灑泣而別後洪先旣長
見公孫御史鰲山詢其所聞於公良然御史者卽公
所指之孫也御史嘗爲余言公初爲郎中奉使畿內
夜遇盜劫其囊得俸銀七兩慚悔而去一日屠人告

衙隸易公銀同官詰之曰馬知非張衙銀乎屠叩首
曰張衙惟有俸銀以是知之是時爲浙右轄尊貴家
口衆矣日料肉止一斤公子某以歲久來省體魁碩
食兼數人公笑曰吾固慮汝不飽也尋遺歸楚中任
滿庫羨金二萬餘公盡籍錄之副在諸司歸見路夫
人戲曰汝常笑吾貧今羨二萬不已富乎自夫人待
公至是始聞戲言則爲應曰得子孫無饑寒常如今
日足矣於是相顧一笑公不獨在官無所私也卽以
小物餽遺亦必有義路夫人卒有以悅奠者公返其
人御史從旁問故公曰悅以爲奠知我廉然不知悅

非奠物也我故返之孟子曰身不行道不行于妻子
觀夫人之言與其處子者益可信矣此至隱細者也
當陝西用兵卽有俘獲止以地方事入奏不爲張大
語故事兵部多幸外功冒恩賞銜公所爲妨已數窘
詰之竟不少變及督漕運入京諸閹用事者聞公名
樂與結納因李西涯戴浮梁傅新喻三公通姓名復
以名香爲壽冀得往謝公固辭曰三公以公會故得
朝夕某則不敢三公強之公不得已各報以幣使者
纔入內城急追還曰幾誤矣吾平生無內交忍一旦
自敗乎其後劉公薦公上曰朕非不知張敷華但

忒難爲人耳公之處已若此然遇人無問善惡休戚
相通不爲峭厲山西鎮守閩人劉瑯以公不便已入
賄其黨移之陝西及代者至相視無禮悔思至于泣
下掌院當考察京朝官三山林公爲吏部欲清汰鄙
薄以厚風俗公於中獨多保全有坐惟頌謗者咸欲
黜之公曰彼不幸而有遭非其罪也曷謫之使自勵
嘗曰寧失不明無爲不仁林公亦莫能奪瑾之害縉
紳也多訶倉庾之虧以爲奸賊公坐楚中耗糧二百
石禍且不測翰林武公康公與高陵呂公皆公賞識
士也康特瑾鄉里故以弄語調瑾曰公陝人也陝人

愛張某如父母忍相薄耶瑾意始解其後呂與御史
云然呂素鳴康之寃言之將以楊康也然公忠厚之
報於是乃見夫喜功者易於矜而持正者近於刻公
捐辭美秩視若贅寵竊念一時意氣激發若可矯強
於功名之際不事表暴與人款款而自操之潔凜
於冰霜非博厚純實剛介平恕迭用而不悖者烏足
以語此古人有言人臣執法而不求情盡心而不近
死力以捍社稷使天下之心繫於一人而已不
與公不其庶幾乎宜其遭遇 聖明先資畢效以身
壯國建擯斥而不悔也蓋嘗因先大夫所論推之當

弘治時朝廷之上未嘗無小人也雖其憚於公議限
於刑賞欲亂君子之所爲而不可得亦以君子者以
其道相勝是以得久於位稍行其言以遂其維持培
植之力若公者是也彼徇俗以就功名之會委曲以
拯時之艱斯人也吾莫得而詰矣惟任已者悻悻以
自是皦皦以自異其始未嘗不藉口於公輩也然饑
寒之慮或奪於妻孥利害之機或間於朋友賣直則
訐陰細而忘大體好剛則觸凶霄而啓釁端理不制
欲之流誠不勝私之積內乏堅凝外無孚感卒之不
免於矯戾眩飾纖靡慘薄之歸而小人相乘翻爲鑒

戒國家元氣因以摧傷若是者視公何如哉使其有以自勝卽不幸擯斥矣其於世豈竟無所補哉此余所以語公行事語若頌而不厭也御史所述皆志銘行狀所未載且憶先大夫遺言不敢忘忽竊緣世誼別爲列傳抑亦備史闕文與或風於君子云爾

資善大夫都察院左都御史東田馬公中錫墓

志銘

靳貴

嗚呼此東田馬公之墓也公諱中錫字天祿號東田先世大都人曾祖歸義驛丞始居故城祖顯父處州知府偉以公貴俱贈右副都御史公幼穎敏不凡處州公先爲唐府長史以直諫忤王煇送京師公時童穉已能隨母走訴于朝得白成化甲午舉鄉闈薦第一乙未登進士丙申拜刑科給事中遇事敢言兩被杖于朝不爲變汪中貴勢張甚人莫敢犯公力陳其不法十餘事汪怒欲中傷之滿三考竟無一隙可

乘升雲南按察司僉事以憂不赴服闋復除陝西僉
事督糧延綏革歲例公一錢不受弘治己酉以監陝
西鄉試爲吏部尚書三原王公所奇改本司提學陞
副使壬子召爲大理寺右少卿時南京內守備蔣某
擅興大獄朝廷兩遣官廉問弗能決公請行盡得其
情乃抵之於法乙卯升左少卿丙辰陞右副都御史
巡撫宣府首革門下工之諸匠奏罷將官之奸橫者
二人不使播毒於下府官隸故爲勢家擅奪者悉禁
革之又疏諸人關者率詣巡撫給符驗如後府式邊
弊肅清而萋斐之言興矣己未引疾謝事家居七年

足不及公府築西菴以自滴若將終身而薦者不已
自給事中張文御史費鎧知府施槃前後至十三疏
吏部亦以爲言乙丑冬今上命巡撫遼東公以邊
軍屯田多爲勢家占種而仍代納子粒迺疏其弊力
請還之軍鎮守招商市馬漁民利公一裁以法謫其
黨尤用事者一人戍廣東遼人大悅丙寅陞兵部右
侍郎轉左逆瑾腹心有冒功請官者公弗可瑾憾遂
矯詔改南京工部左侍郎尋勒致仕瑾怒未釋迺以
遼儲損腐追罪巡撫爲名卽公家械送遼東獄遼人
雅德公願貸償者盈路公曰如此將重吾罪固謝之

盡賣田廬貸親知以償久之橐爲民庚午瑾誅上
復起公巡撫大同革弊任怨如在宣府遼東二鎮名
益重明年山東劇賊劉七兄弟暨齊彥明楊虎等起
跳梁近甸兩河間猖獗甚師征久無功廷議咸謂非
公不能滅賊迺以惠安伯張偉爲總兵升公右都御
史督軍務公兼程至首敗賊于彰德又敗之于河間
泊頭升左都御史已賊勢轉熾公遣叅將宋振球棗
強振逗遛弗前賊屠棗強縣知縣以下死者七千人
公乃單車入賊壘諭以福禍欲不事兵革招狹之賊
權聽且爲感泣公遂以賊願聽招撫奏聞俄而賊焚

劫如故言者劾公爲賊愚誑以重民禍迺并偉俱徵
下詔獄繫凡八越月感疾卒實壬申五月二日也年
六十七公性孝友事繼母能得其歡撫諸孤姪有恩
居官剛介不受私囑其子當廕或請援例陳乞公曰
乞字豈宜出吾口竟弗乞慷慨尚義揮金如土苴博
學工詩豪於文語多奇麗可傳尤長四六所著有甘
陵志族譜箋經寓言宦跡所至各有藁

十一年巡按御史盧雍追訟其寃謂賊實聽招而僉
事許承芳忌之密請益兵以疑其心後雖更受中錫
約束方至軍門而徵入之命下矣朝廷是其言賜祭

一壇中錫歷官俱有可觀而忤瑾得罪尤爲時所重
招降之謬未必盡如言官所論而劉七輩橫行猖獗
其勢非可招者或不免於怯云 實錄

資善大夫都察院右都御史贈工部尚書王公

鼎神道碑銘

楊廷和

公諱鼎字器之姓王氏其先定遠人高大父諱寶曾
大父諱良皆以武功得官至大父諱智改業儒父諱
佐舉鄉試歷教桐廬鄒平學者稱爲三留先生俱以
公貴贈通議大夫都察院右副都御史大母傳母高
俱贈淑人公少慧甫能言教以詩應口成誦年十二
能屬文超悟出同學諸生上有司欲以奇童薦三留
止之成化十三年舉于鄉十七年第進士補上饒令
三留懼其年少多易時寓書訓飭之奉以從事明斷

有聲中貴人取水晶凌轢郡縣獨於饒稍戢陰戒其
下毋觸尹損威內艱改樂陵歲饑盜起民流徙旄
孺饑無養疾無藥齒齧暴露草野無爲瘞公悉爲之
所又舉救荒顧役之法以收集其壯者給牛具種子
歸業業而農者四百餘戶于時宮猶督過通負公
與期約田之入半以輸公半以活其家或謂能鳥釋
則颺矣公曰渠食不續必死負如故公則奚利焉吾
且生之彼將孚惠我德果輸如期徭役定九等戶爲
差部使者下其法于諸道又以餘力修孔子廟及學
舍并攝旁縣事之不治者考最擢監察御史大臣有

冒功奪爵復謀起用者公會臺諫劾之事寢親藩誣
詆守臣復會論之出按蕪常諸郡薈剔夙蠹奸民挾
援移獄跡甚祕公半言而決丹徒瀕大江風濤怒醫
田去而洲生公以蘆之利歸田主糧以無負代還總
御史臺章奏與修問刑條例陞光祿寺少卿外艱改
大理左丞進右少卿右轉左奉勅勸處魏國常州
庄田會羣小以民田附獻爲皇莊及江陰卞陳二大
姓爭田皆以屬公按問奏復稱旨進俸一等尋忤逆
瑾意謫保昌知縣歷寶慶同知河南按察僉事入爲
順天府尹時瑾焰尤熾公善晦緩禍而事多救止瑾

誅遷都察院左副都御史掌院事尋進右都御史侍
 經筵與讀進士卷當雄峻之地而居之若不勝時
 有隱憂疾遂起五疏乞休 溫旨慰留之再疏 上
 念其勤懇乃允賜勅以歸途次與傳仍給月米二石
 輿隸歲四名陛辭又 賜玉帶一皆異數也公在林
 下凡七年厭拘儒局挾挾去藩籬與人相接良賤疎
 戚無不得其歡心時鄉有五林先生泉山司馬成齋
 司徒竹田司空敬齋太僕南澗都憲皆以宿德結耆
 英之會公齒猶未及泉山用溫國故事請入衣冠盛
 事聞未前有也公天性孝友將葬母念闔地多水蟻

恐恐然有體魄之慮日夕抱棺慟哭時若乞靈于幽
 一夜夢高淑人語曰葬我祖山壤垣之下果得吉壤
 及塋有水鶴遶樹之異在光祿時謂請告省三留侍
 養者數月三留卒又得致其自盡之情人以為誠孝
 所感待諸弟有恩而教之甚嚴詩文不事雕刻情麗
 可觀所著有兩臺諫草巡吳錄新齋雜稿凡若干卷
 新齋其別號也

詳於其狀也
 下野汎者休所建藉草災吳險陳派錄師其其于
 汎者皆諸侯所以而考之其類皆文不事刑修
 其首效民二當卒又將疑其自盡之計或以
 八聖亦水辭遊林之異其光輝却暗前古官三
 一外其高城入其日華非味山樂世之不果
 其然然亦豈與之歎日又其辭謝矣其其子

都察院右都御史太子太保謚莊襄俞公諱

誌銘

喬宇

嘉靖壬午 聖天子 勵精求治思用耆舊於是
 臺臣以致仕右都御史俞公薦遂起于家使督漕運
 兼巡撫鳳陽等處癸未 召入掌院事兼侍經筵助
 耕藉田甲申五月二十一日以疾卒訃聞 天子震
 悼遣官諭祭及營葬事勅有司具舟載其喪歸贈太
 子太保謚莊襄然在朝士大夫以公之賢不究于用
 尤歎惜焉公浙之桐廬人也自幼穎異讀書過目輒
 成誦十年遊邃菴楊公之門亟許之嘗入太湖山讀

書不足至城市者三年淹貫經史學者翕然稱之弘治庚戌登進士觀政工曹奉命修江西王墳諸餽無所入及授長清令值旱饑公至輒跣足走禱且賑濟其不能存者每歲春給牛種勸之耕公暇則會諸生講析經義懇懇不倦部使者屢上其治狀戊午赴召民立石塑像以祠隨拜南京江西道監察御史同僚有匿親喪者公劾罷其官辛酉奉勅清西蜀戎籍廉明不苛積弊盡革其後御史因其法不敢變至爲師善碑以紀之乙丑擢河南按察司僉事雪花崖賊呂梅等作亂公率兵破之擒梅以還俘其黨數千人是

冬丁母夫人憂正德三年服闋復除山西按察司僉事逆瑾方擅威福間出內批遣寺丞往邊境諸郡取兵爲它用公慮其意不可測往白巡撫大臣寢其事瑾大怒方欲中公以法不果已已擢江西布政司叅議袁州有富民構訟累年不能決公閱案良久曰吾得之矣卽坐其爲首者一人于獄訟遂息旣而大帽山賊鍾仕高作亂公復率兵討平之民感其德爲立碑焉功旣上擢廣東按察司副使中道名爲大理寺右少卿已而轉左是歲江南治水乏人朝廷以爲憂公卿僉薦公才可任遂以公爲都察院右僉都御史

總水利于蘇杭公作歌諭民築圩塘以打水民享其
利衆議方急開白茅港公謂港近海沙隨潮上下徒
勞民力耳上疏罷其役未幾山東賊劉七等來江上
爲患擢公南京都察院右副都御史奉勅專理操江
賊竟就擒癸酉江西有司奏桃源賊王浩八率五洞
蠻兵劫掠州郡勢甚猖獗上勅公往督軍務公選
將運籌靡間晝夜征凡九皆大捷遂蕩平其巢穴以
功進右都御史賞賚白金表裏詔公復巡撫其地建
昌賊曰徐九齡者爲患尤劇積三十年官軍不能討
公復命師盡擒以還上大喜手詔褒獎加俸一級

時宸濠方蓄異志以得上賜欲撫臣以下朝服
公不可又去其左右爲惡者濠怨公甚屢欲殺公幸
得免公以疾乞休乃內銷陶權以奪其官既歸杜門
不出者六年又名起督漕運兼巡撫清寃獄黜貪吏
所至肅然漕政壞公思減推挽之費疏清三分而所
其一上下稱便寶應湖水蕩嚙堤岍公命值菱蒲其
側蜿蜒如龍然水患以平今所謂青龍港者是也會
歲凶又發粟賑濟全活者衆河南賊王堂等往來寇
淮西諸縣公下車未夾月卽平其亂有司誣良民爲
盜者公審釋之皆感泣而去入治院事守法詳刑明

察嚴厲諸御史咸敬服公性孝友嘗宿他所忽心動
比明有訛傳其父鄖陽公沒公號慟卽走數千里外
至九江舟適相值鄖陽公尚臥病舟中父子相見悲
喜交集及卒扶柩歸葬復廬墓側哀毀幾不能生居
母喪亦如之公居官受勅凡二十八道有衣服飛魚
之賜年七十病卒時諱諱夢中語皆朝廷天下事也
卜葬于孝泉鄉黃泥凸之麓

都察院左都御史西軒陳公金神道碑

蔣冕

光祿大夫柱國少保兼太子太保都察院左都御史
西軒先生陳公正德辛巳致仕嘉靖戊子歲九月卒
于武昌之私第享年八十有三訃聞上輟視朝一日
賜諭祭者九府若縣治其葬事公諱金字汝礪西軒
其別號也世居德安之應城自公之考始僑寓武昌
而返葬於應城蓋三世矣曾大父諱居敬石首縣學
教諭大父諱坦夔州知府生四子其季諱琳景泰甲
戌進士南京監察御史廣東按察司僉事致仕自教

諭而下三世皆以公貴贈光祿大夫柱國少保兼太子太保左都御史妣皆贈一品夫人公以縣學生舉成化戊子鄉貢壬辰登進士第授徽之婺源知縣鋤強糴梗不少假貸邑有豪猾素持官府短長者望風遠遁終公之任不敢歸每歲徵派及軍需各項物料出納若干所餘若干一一榜示通衢民皆灼知其數他日復有徵派但取前所餘者給之不復再索於民戊戌擢南京山西道監察御史去之日民爲建遺愛碑巡視長江盜賊屏跡尋巡察都城內外街衢擒奸僧之有妻孥者正之以法權要不能曲庇人皆快之

滿三年以僉事府君憂去任服闋北上適弘治改元補江西道出按浙江監試事綜理周而防範密還京推掌三法司事凡章奏非經公畫可者不以上聞辛亥二月擢山西按察司副使時張簡肅公以都御史巡撫其地奏乞暫增解池鹽課以補宗藩歲祿屬公督之時河東歲荒竈民逃徙者甚衆公發粟賑之逃徙者皆來歸不半月鹽課告完歲祿始得不乏丙辰遷貴州按察使公至俯順夷情凡以事來訴者必爲之剖斷曲直雖訴者踵接未始辭勞未半歲調雲南按察使送者遮道輿馬至不能行公揮之以扇父老

苦欲留之既得扇相向分持而泣久之始散蒞任未
數月述職于朝戊午擢雲南左布政使督兵平竹子
箐叛夷陞正二品俸庚申十二月進都察院右副都
御史巡撫雲南孟養爲邊患數十年公遣人省諭卽
幡然改悔歸侵地十三處遣酋首獻土物于京奉命
合貴州兵共剿夷賊米魯福祐賊皆授首餘黨悉平
又陞俸一級滇池水溢渰沒官民田公築堤障水疏
濬有法田沒而復出者數千頃清屯田馬政及歲造
軍器累年積弊搜剔無遺一考滿以母老奏乞終養
不許甲子陞南京戶部右侍郎正德丙寅冬進右都

御史總督兩廣軍務兼巡撫既抵任凡二廣利害興
革殆盡而於邊防夷患尤悉心計處馬平獐大肆猖
獗親統十三萬衆直抵賊巢平之陞左都御史遂遣
官省諭古田賊其酋願悉歸侵疆輸王賦如他州縣
又省諭斷藤峽賊亦願通江路不阻遏往來朝議嘉
之賜名永通峽公又命偏裨統兵蒞羅傍積年惡徭
皆率衆歸款各處據險肆惡者聞之悉畏威休惕不
復敢喘息已巳春陞南京戶部尚書七月而郭夫
人訃至數日奉命改左都御史掌院事令乘傳赴京
而公已解官奔喪歸矣賜祭仍遣官治塋事江西盜

起兇燄日熾辛未四月詔起公于家總制江西等七處軍務公迫於上命卽日畧衰就道至則督兵剿賊尋以本地兵寡乃調兩廣土兵搗賊巢穴壬申二月剿撫州之東鄉五月進剿南昌之姚源七月又進剿瑞州之華林山俘斬多至二萬餘衆還掠千餘人三郡皆建祠肖像事公加太子少保廕一子爲錦衣衛世襲百戶公又以大帽山等處賊寇連年不靖督閱廣南贛兵攻之皆大有俘馘其年冬公疏乞終喪上以公孝情懇切特允所請尋廕從子善恭爲國子生乙亥吏部會廷臣議兩廣總督巡撫難其人推

公仍舊任加太子太保公懇疏辭免不允丙子三月公再蒞梧卽遣長子善道原官錦衣衛署百戶至是兵部以公前日廕子恩奏加善道錦衣右所見任五千戶制可葢異數也公以兩廣公用全資鹽利而鹽利之徵不取之於皂惟取之於商乃一二查復舊規至今行之官商兩便又以廣東鹽利外惟鐵稅爲大往時利多不歸公府乃集羣議立廠佛山堡徵收而公用始有所資南雄府之保昌縣舊有虛糧七十餘石每年責令見戶陪納公以本府太平橋所抽稅銀歲不下萬餘兩多入私門乃以稅銀四之一代納又

以潮州府所轄諸縣亡戶米及失總米共五千二百餘石均派無干之民者亦於本府廣濟橋鹽利內如數代納又令全州官田米八千餘石本色折銀中半徵之如制而無徵絕戶米通令拆銀由是各郡民始獲少甦又以海賊肆為邊患督官兵窮中至外洋焚其僭用龍衣等物前後斬首招撫及殺傷墮水死者二千三百餘人又以府江賊勢流毒不已督率副總兵等官分道進剿俘斬首從賊徒甚衆丁丑正月加少保仍兼太子太保左都御史廕一子為錦衣世襲百戶且獎勵公勅其回京蓋自撫平孟養至是凡降

勅獎勵者入前後賜白金一百二十兩文綺十又四各有副又特賜金織衣三襲大紅蟒龍衣三襲玉帶一圍蓋上以公久勞邊徼累著勲庸故惓惓不忘如此初公再蒞任日事體法度視前日大異心欲修復同事議多不合雖督兵禦寇日不暇給不容不以老病辭而上之眷倚日益隆重其批荅之語謂公長才宿望威愛素著前後總督軍務深得兩廣民心累建勲庸人咸倚賴正宜盡心討賊以副委任豈可累疏引疾求退至是恩命加隆公益感傲無已雖奉命就道而深以府江賊患為慮奏欲移平樂守備官

於昭平增撥民快弓兵哨守巡邏而於沿江之地凡山勢險峻賊難踰越處所則無事隄防其餘但有徑路可通賊行者或堆砌亂石以填塞之或斫取大木以阻遏之至稍平去處則開掘深阱斷其往來仍調柳州慶遠田州三府壯勇土兵三四千名分耕沿江荒田官司各以牛具種子給之仍給以行糧暫於梧州庫所貯官銀或倉糧查給待荒田成熟罷給五七年後量輸租稅仍于其中擇其素有謀勇衆推服者立爲總小甲以管束之又數年後事體既定或設長官司或設巡檢司令其分番往來哨守巡邏而民快弓兵始一切不用兵部議上詔以公久督戎務熟知軍民利病令鎮巡官一一如所擬施行務及時整理以爲久遠之圖識者謂公言鑿鑿可行上意又銳欲行之惜無有能奉行之者至今邊氓猶以爲恨公感上知遇歸自蒼梧不復敢以病辭丁丑九月自武昌北上十月至許州數日又臥病武安連疏乞歸不得命而病是日增乃自武安徑歸就醫治疾具疏以聞旣而連得溫旨有云朕念卿久勞於外茲特勅取回京吏部其卽遣人促之北來以副委任又云卿累朝耆舊德望老成已令吏部促之回京宜勉承

朕意不必固辭又云卿才望老成朝廷方切倚任還令鎮巡三司等官促來供職今後不必再辭公捧詔感泣曰上之眷我至矣今雖老病敢不誓以死圖報萬一哉時武廟南狩公夙憂危已卯十月遂星馳至京庚辰六月手勅吏部命公掌都察院事公辭不許又奏乞休退不允先是公在兩廣時以郝佳樂昌盜起督廣東鎮巡官合兵攻之至是廣東巡按御史奏捷于朝有旨廢公子一人於原受廢職事上加陞一級兵部議以公次子善良爲錦衣副千戶知詔旨又以公長子道善軍功陞錦衣指揮僉事公皆不

能辭也辛巳四月今上御極公連章請老五月始得俞旨令乘傳以歸善道亦得請還家侍養於是公之年七十有五矣家居未幾以上尊號恩有司給米二石歲夫二人嘉靖戊子九月又以上徽號恩有司具綵段羊酒問勞衆方期公壽祉益綿不意甫數日遽以疾不起矣嗚呼悲夫公長身偉貌嚴重剛果望之有毅然不可犯之色筮仕之初卽慨然以功業自期明究法律練達政體於本朝前輩可爲模範者恒舉以自勵與人論事疊疊不竭聽者忘倦事無大小所見既定自信不疑剴繁處劇從容酌應訟課填委

歸德錄 卷之五十四
剖決如流凡判斷公移書於紙尾者雖出於尋常應
答亦靡不周悉詳盡僚屬見者皆錄之以爲法一時
敏達者咸以公爲稱首別歷中外五十餘年每蒞一
官必恪勤其職不少自逸至以文臣兼武事馳驅戎
馬間所在皆茂著勲烈而在廣之東西其功尤偉晚
年總憲內臺曾未數月遽求休退故雖位極三孤壽
踰入袞知公者猶以勲業未究爲惜所幸聖明在御
體貌大臣每全終始故公雖里居累膺恩賚及屬纊
後賁終之典尤備生死榮哀其亦可以無憾矣

都察院左都御史王公璟傳

王璟字廷采沂州人舉成化壬辰進士除登封知縣
六期以清節聞擢南道御史凡所論列悉關大體讞
獄不泥成案率多平反以起復改北按視山海等關
係定諸郡旌別臧否罷行利弊累至光祿寺卿轉右
僉都御史總理兩淮鹽法通變革奸私販屏跡浙東
大饑被命賑濟條上經畫要宜十事奏省抗湖軍糧
三十餘萬石所活四十萬人改巡撫保定疏陳地方
事宜并乞罷皇莊名目以蘇民困 孝廟嘉納之時
中官奉 命勘寧晉新河諸縣土田吏稍侵侮遂奏

遣官校捕捉鄉民二百餘家遠近驚擾璟備疏其害謂宜斥罷諸璫田土盡歸小民人皆壯之正德丙寅入理院事逆瑾矯詔罷公官辛未瑾誅薦起巡撫山西時巨盜流劫河東為甚璟至閱視通賊處所設險防禦製火鎗火箭等器攻守具備斬獲頗多山西地瘠民貧復經兵燹凡各部歲派物料及戰馬四千餘璟疏請改徵以甦困弊已召為左都御史掌管院事獨持風裁朝廷倚重嘉靖初進太子太保乞歸因給廩米輿皂仍勅有司歲時存問皆曠典也卒賜祭營塋如法今祀學宮

資政大夫都察院右都御史張公綸墓志銘

費宏

公諱綸字大經別號敬軒姓張氏其先鄱陽人也在宋高宗時有為寧國路總管者因家宣城於是為宣城人曾祖諱原甫鄉人稱留福處士以仲子皞貴封武畧將軍宣峪衛副千戶祖諱擘為湖廣右叅政父諱輔號逸菴俱以公貴贈資政大夫都察院右都御史妣俱贈夫人公少敏知學成化癸卯領順天鄉薦明年登進士第初知鹽山卽明習吏事首除民害數人取貴戚所侵田歸之業主設義倉以備歲凶撫按

官交章薦之弘治辛亥以風憲名且行民遮送恨不能留壬子授浙江道監察御史監蘆溝稅巡內庫巡光祿寺皆以嚴辨聞甲寅巡居庸諸關邊備必飭武臣有縱恣者繩以法風采凜然尋以內艱歸丁巳終喪改雲南道按真定諸郡賊吏望風斂戢任縣令以非法殺人罪未正鞫實坐之富民被盜誣讐家煨煉獄成公察其冤脫論死者十三人於桎梏他平反又百十餘人平鄉令欲增淤田之稅且百頃公曰河濱淤決不常可遺民他日患邪事遂寢會清寧宮災陳時弊十事多見采納壬戌以久次陞光祿寺少卿時

藏用不足公疏浮費所當節者數事尚膳中官索上供踰額詆侮僚屬又疏請司禮監懲之嘗助獻內壇

上顧問近臣是非張御史邪蓋孝廟臨御既久方疇洛俊又以公屢嘗建白故屬意焉劉瑾舊嘗識公正德初擅政恨公疎已欲中以禍賴李文正公力救始免尋擢通政司右通政戊辰又擢都察院右僉都御史瑾熾日熾縉紳多罹危禍御史有荷校於通衢者公亟偕僚長救之未幾擢大理卿奏讞輒忤瑾意時時與辯逢瑾怒不爲少動致仕都御史張珍家爲仇所訐三子論斬坐沒入江南民吳某沿俗競渡

偵事者誣以爲私造龍舟亦坐沒入皆賴公力辯得
未減興襄二府訟田不決者二十年矣公往處帖然
歸奏稱旨有牽醪寶楮之賜歲辛未中貴錄囚欲脫
豪右殺人者罪公不可擬竟如初高陽民王彘爲奸
僧所罔刺臂肉爲龍形捕獲者欲坐叛侈功公謂法
止梟首用是不合調工部右侍郎癸酉改刑部侍郎
尋轉左時偵卒多羅織無罪公言於僚長務挾實毋
致枉人乙亥往覈代府博野王兄弟互訐事會晉府
慶成王獄久不決亦以命公公訊鞫詳明奏當皆麗
于法因疏處宗室選婚及祿米折銀二事偵卒獲入

京虜謀連引且至百人會鞫欲盡坐之公曰謀若是
其多邪止罪其二餘盡釋丁丑以九年滿陞都察院
右都御史方奉命南行還歷淮泗目擊水災慮民窮
盜且起乃以給賑蠲徵諸事宜上請所司皆議行之
山東民趙萬興假妖言惑衆取美女以后稱有二儒
生從之爲漁獵計也偵事者獲之將以叛論公辯其
非叛得不族蓋公留意法律善察奸僞而斷獄平恕
未嘗過求故自任臺憲以至持天下之平於死囚多
所開釋庶幾於民自不寬及今上登極方窮治正
待間惡黨繫臺獄者數十人公乃數其罪狀以爲當

誅而不可赦其嚴於懲惡又如此然連及巨璫疏入
月餘不報公疑焉焦勞感疾乃懇乞退休疏入上始
得俞旨有月廩歲隸以寵其歸歸踰年忽構疾而逝
蓋嘉靖癸未四月某日也訃聞上惻然賜祭葬如
制公行甚篤自逸菴歿後家益落授徒內供母養高
祖塋栢山久失守倍價贖之從兄剛老而無子以田
贍之終身從子鑑少孤以故畀之其夫婦繼沒塋皆
公治且爲撫其諸孤各有室家又嘗修譜系置墓田
爲收族計甚悉治家嚴肅嘗語諸子當以謙持盈因
書柳氏家訓以警之性慈仁行道見齟齬必痊雖螻
蟻弗忍殘與人交不以存亡異情自筮仕以來所居
官必盡職求稱其在言路持論必存大體恥掇拾長
短以自爲名李文正公嘗謂公苦自樹立與世之徇
勢浮沉無所顧惜者不類平生所著有出巡錄憲臺
奏議棘臺駁稿三使錄晚效文正公爲詩渾厚清婉
有敬亭稿若干卷藏于家

自慈亭辭去十餘年矣
 其籍棘亭則其子其孫則其文五公其封其墓其
 喪葬或無貲賻者不賦平土則其亦世世推其
 或以自為官者文五公嘗謂公苦日協正與世之
 官必蓋淵來其言其言必亦大哉亦其言長
 難求必與與人交不以亦其言其言其言其言

資政大夫都察院左都御史桂巖邊公憲神道

碑

費宏

嘉靖甲申夏南京刑部尚書邊公用薦改都察院左
 都御史公趨命北上入舟而病未幾過家遂以訃聞
 詔有司諭祭營塋皆如制公諱憲字汝成別號桂巖
 世家河間之任丘曾祖諱復初以從 太宗文皇帝
 靖難授百戶祖諱永以正統乙丑進士歷戶部郎中
 後俱以子貴贈都察院左副都御史父諱鏞累官至
 南京刑部右侍郎母徐氏封太淑人公之生侍郎公
 有異夢甫十歲能為韻語書過目輒成誦既長學於

少傅遂菴楊公以遠大期之成化癸卯舉于鄉明年
登進士授青州府推官時甫弱冠人皆以少易公公
發奸讞獄如老吏郡中無不畏服者青濱海海溢壞
民田廬將及城公率衆築隄障之城中人恃以無恐
值歲饑議賑撫按以其事檄公公計口給食處之有
法所全活者甚衆又屬公均六府之役其輕重盈縮
一視貲之高下里書奸莫能售民皆便之弘治癸丑
擢湖廣道監察御史奉命按山西復按宣大所在白
別賢否裁抑貴勢風采凜然陳邊務數事皆爲上
所嘉納又奉命至遼東覈實邊儲諸宿蠹剔抉殆盡
兵出宣大受紀功之命人不敢請寄冒賞爲尤難此
還陞淮安知府以父憂歸服除改鳳陽不兩歲積備
賑之米至萬餘石正德丁卯陞浙江按察司副使時
逆瑾竊政欲士夫阿已往往假他事羅織爲罪而罰
米以困之公所罰二千餘石然竟不肯少挫庚午陞
按察使尋陞布政司右布政辛未陞都察院右都御
史巡撫山東畿甸賊流入內界公遣官分禦多所斬
獲嘗荷敕獎勵且有金帛之賜明年賊勢益熾至命
近臣統諸將以邊兵剿之師久無功言者請罪一二
重臣以示警公與保定巡撫蕭公翀俱就逮繫獄旬

歲賊平始得釋以舊職謝病家居公處之恬然未嘗有怨甲戌起復公巡撫寧夏至則築垣塹蓄芻糧凡邊備罔有不飭嘗禦虜花馬池斬馘若干虜遭挫衄而遁又禦之紅兒山五月七捷事聞獎賚有加丁丑陞南京刑部右侍郎己卯改戶部右侍郎以母憂歸服除以舊官總督太倉疏漕運數事未幾轉左莅部事乃南遷尋復有中臺之擢其卒距生天順甲申春秋六十有一公資稟篤實容觀簡重孝友爲鄉邦所稱有時鮮必薦然後入口徐淑人旣老失明公左右扶掖未嘗少離兄弟七人居時日聚食遇親友恩禮出至日未嘗及人過失有犯亦不與較居官清慎嚴取與夙夜奉公蓋邊爲河間望族相傳漢有司馬者其大家至今猶存入國朝則戶部登甲科爲郎吏號稱長者而位不滿德故其子孫多彬彬以文學起家而公遂至九卿之長以功名終可謂盛矣

宋而公遊至此... 其大派至今... 淵源與尼... 出至日未嘗... 人處夫亦不與... 碑

資政大夫都察院左都御史贈太子少保吏部

尚書謚莊靖宋公景神道碑 嚴嵩

嘉靖丙午冬 上名南京兵部尚書宋公為都察院
左都御史公以疾辭不允時當天卜諸司述職聚闕
下臺丞實與銓部同職考察公至則力疾稽牘評隲
臧否手披心計殫日夕由是疾增劇乃丁未正月之
八日卒于京師里第 上聞震悼命有司諭祭營葬
如例而贈公太子少保吏部尚書賜謚莊靖蓋異數
云於是公子鄉進士介慶謂嵩於公同鄉又同弘治
乙丑進士請書神道之碑憶與公賜第後仕官中外

宋敬宗 卷之五十一 七

垂四十三載當時同輩存者無幾而公又不可作矣
烏能已於情邪謹按公諱景字以賢世家南昌奉新
曾祖惟寧祖鑑有厚德施於鄉考廸嘉妣涂氏公貴
累贈其祖與考皆資政大夫南京吏部尚書妣皆夫
人公少孤奮于學弱冠爲諸生試每居首器體凝重
識者占爲公輔之器弘治辛酉舉江西鄉薦再會試
擢上第授河南睢州知州治行卓聞改河南道監祭
御史是時逆瑾竊柄公慨然引疾去家居十四年足
不及城市若將終焉而物望鬱起提學田公汝耘巡
撫盛公應期先後疏薦起爲浙江按察僉事未踰年

聞母病卽棄官歸太夫人卒哀痛勺水不入口者五
日服除陞山西副使會汾州介休饑民相聚爲盜殺
地方官勢張甚撫按檄公往征之督率行伍躬冒矢
石擒獲其渠魁釋降附宥脅從民賴以安青羊山賊
陳卿亂公又合兵討殪之奏以潞州爲府而創立平
順縣公之功爲多陞公山東叅政改福建尋陞四川
右布政使俱未赴改山西左使公以晉陽地瘠賦繁
民多逃竄虛稅每責償平民請名人佃種而坐以輕
折又定九則徵派之例以祛里胥積弊咸著爲令轉
南京光祿卿擢南京院右副都御史總督南京糧

儲革攬納禁糧長揭債減呈遞樣米謹通關之驗收
 京儲以清改左副都御史佐理院事歷陞刑部左右
 侍郎拜南京工部尚書時修南京奉先殿及舊邸世
 子府又造黃船公節費料十之七八事竣有白金文
 綺之賜改南京吏部旋改南京兵部叅贊机務至卽
 奏裁守備叅隨人役考選武職清查快船困弊精覈
 養馬利害戎政肅然公履行端嚴執守堅確人不敢
 干以私然貌恭氣和於物無忤故賢者樂之不善者
 亦未嘗有怨焉官雖久自奉不異布素方 聖明倚
 毗名正臺端朝野屬望而公一疾不起豈非世道之

不幸哉

蘇州府公為重部御史陳望絕天下上心憂之

蘇州府公為重部御史陳望絕天下上心憂之

蘇州府公為重部御史陳望絕天下上心憂之

蘇州府公為重部御史陳望絕天下上心憂之

蘇州府公為重部御史陳望絕天下上心憂之

蘇州府公為重部御史陳望絕天下上心憂之

子亦又過...
 請...
 奏...
 署...
 下...
 不...

榮祿大夫太子太保都察院左都御史贈少保

謚簡肅東洲屠公僑墓誌銘 呂本

東洲屠公為左都御史標望絕天下上心重之嘉
 靖乙卯元日大霧木盡水史獻占曰災在大臣是日
 公感疾越十二日卒年七十有六公先世汴人始徙
 淮楊再徙無錫又徙鄞公以成化庚子生領弘治甲
 子鄉試正德辛未進士以才試御史明年母喪去起
 復巡按居庸周覽關隘歎曰公家之北門也於是飭
 城堡繕障隊嚴甄諸邊將怯勇材鄙當是時承平久
 人溺宴嬉巡撫臧某兵備舒某見公所為頗過之卒

虎擒生

乃歎服 武廟常命公擒生虎使者日數輩公抗疏
曰此惡獸也擒之必櫻其爪牙 陛下欲取一時玩
奈何不惜民命乎且非萬乘所宜近語甚切其事遂
罷於是屠御史直聲聞四方當按江西寧庶人有異
志以賂結中外所憚者獨公耳乃陰使鎮守畢真齋
重裝自浙覬之卑身佞辭蘄於必納公先事覺牢拒
不受至則與巡撫忠烈孫公深相結叅政金僉事啓
黨逆勢張甚公方圖之會父喪去寧庶人卒賊死再
起適 今上登極益慷慨思見其奇首疏請日視朝
接羣臣親賢圖治聲望隆起為當道所忌擢知保定

府陽謂人曰保定畿輔重地非屠御史不可公為之
卽大治都指揮白璽以稔惡聞公按置重法總兵陳
瑾怙勢恣睢公獨不為屈卒為瑾中調延平知府踰
年郡亦大治擢山西叅政尋擢山東按察使以又擢
廣東右布政轉福建左四官咸有惠政尤以廉率下
為左使入覲不持一物諸計吏亦無敢取者遷光祿
大理二卿嘉靖戊戌拜刑部右侍郎明年以灾免又
明年用薦者言起為左侍郎久之拜南京刑部尚書
丁未調刑部未幾改都察院左都御史九載秩滿加
太子太保自公執邦憲益以風裁自持每奏差諸御

史必得其宜還京考察不苟應文務覈功實諸屬帖
帖嚴之平居挈提綱維涵蓄細碎不發聲色至於臨
事決疑激揚清濁苟係國體以身當之未嘗退阻也
公清節直聲發聞最蚤及登八座年老矣世態體局
逐日以異而公始終一致不為毫髮少變其初嗚呼
難矣公為大理卿贈祖琛父湖如其官及為尚書又
得加贈其祖父琛之祖曰順者嘗以孫襄惠貴贈吏
部尚書公於襄惠為從子皆自尚書改都御史加官
保勛名先後相望公沒上慟甚贈諡喪葬甚厚其
後欲用都御史輒問曰得似僑否其見重如此僑公

名安卿其字別號東洲

都察院左都御史周公延傳

周延字南喬吉水人嘉靖癸未以進士爲潛江令尋
調新會發摘撫字得民畏愛俱祀名宦祠戊子名
爲兵科給事中時議奪新建伯王守仁爵公上疏言
守仁豎直節於逆瑾構亂之時糾義旅於先帝南
巡之日且其倡道東南四方慕義建牙閩廣入寨底
平今欲以一青盡棄生平非所以存國體昭公論也
忤旨謫判大倉州丁外艱起補宿州宿人祠之如
兩邑歷陞閩廣藩臬值南交議起贊畫居多而中使
採珠者畏其禁令不敢苛暴以右副都御史巡撫應

大首清海洋林成之擾次復漂陽水次之先以兵部侍郎兼秩督兩廣軍務節冗費杜倖功疏止番舶交易罷瓊萬烏石諸驛歲省數千金召還刑部累陞南吏部尚書改南兵部叅贊機務乙卯特召爲左都御史考察天下述職諸臣者再在廷諸臣者一陟黜瑕私莫敢干獨立朝著望者斂容臺綱爲之一肅公方峻謹潔無他嗜好面顏寒峭人不易合一介不苟取燕坐一室儼如對賓妻子不敢輒至其前官益尊顯而清約自守交游屏絕門外蕭然不異在下寮時嘗自贊其像曰退然若畏鈍今似迂然其不違義不趨利不隨俗不靡風者殆之死而不敢渝也卒贈太子太保諡簡肅

公諱維風編

維風編 諱誠臨 吳其號也 祖曰瑞 父曰倫 感以

周中丞公延初第時與其里中進士曾某同觀政刑部共僦一寓租一馬更乘出入一日公先入部方回馬趣迎曾曾未及至而司寇公適蚤至鳴鐸升座矣司寇視班行中曾不至詢其故公前以實對司寇公大詫曰今進士俱乘馬耶亦大異矣予觀政時一僮携冠服徒步至三法司門乃服之入也今士風乃至于此爲之三慨公語今蕭右司寇廩云蕭公亦吉州

人也 使司寇公觀今士習慨又何如

愚賦性曾曾未及至而自欲公與我至誠戰長風矣
潛共燃一寓卧一黑更乘出人終日公武入清文回
風中丞公我賦兼報與其里中進士曾某同贈如陳
荷衣緜風漸室備知對府安子不致無至其前官金
太子太尉鑑前直交注錄記門外清然不與在下察
不賦休不割谷不舉風青頤之天而不煩命承率領

太子少保都察院左都御史臨溪張公永明墓

志銘

公諱永明字鍾誠臨溪其號也祖曰瑞父曰傑咸以
公貴贈左都御史祖母章母史咸贈夫人史夫人生
二子長永秀南寧府教授次公蚤游郡學每試輒先
諸生嘉靖甲午舉于鄉明年舉進士授蕪湖令蕪湖
當孔道使客厨傳日不暇給民坐困憊甚矣公則首
為裁節歲大稔則發貯賑貸藉以全活者甚衆 章
聖梓宮南柩所過郡邑設綺紈帳殿供器心金為之
又闢宦厚索賂遺一不當意輒辱官司官司莫敢誰

何公於瀕江佛寺堊其棟宇代帳殿飾供器箔金以
代台省節不貲而調度有方卒無讎叟於境上者護
行官交口稱能事竣以聞有白金文綺之賜庚子以
治最推南京刑科給事中公論事務持大禮不拾瑣
細遇所當言者卽蹇蹇無顧忌是時分宜任子竊權
穢跡如甚公卽彈劾數十事語極切直人人危公抃
虎鬚公弗憚也乙巳出爲江西布政司參議所部礮
廠次有呈式費歲計不啻萬緡公悉罷之陶人德焉
戊申陞雲南按察司副使初黔國自以勲閥世鎮滇
中尊無未抗易覲藩臬諸與諸寮率處謁月朔則謁

其祖廟躡爲故常公譙其驕僭將言于朝黔國遊
稱謝迺已辛亥擢江西布政司參政主督版籍影射
兼併宿弊一洗甲寅擢河南按察使亾何憂去會島
夷鼓譟薄湖城城中戒嚴民從外呼號不得入公惻
然曰莫非黔首也獨奈何棄以與寇亟白監司開關
入之於是懽聲動地曰張公生我張公生我丁巳起
補陝西按察使尋轉陝西右布政時關中地震死傷
狼籍公憂惶甚籲天引咎撫卹收掩視諸司尤如意
焉戊午稍遷山西左布政明年晉都察院右副都御
史巡撫河南先是河決逼汴城周藩上言龍卵示變

水災異常不卽改清患且滋甚詔下所司集議大
役且與屬公至源委堙決所繇乃決策曰因勢利導
修塞足矣改濬何爲于是條具利便肅皇帝可其
奏民不勞而河卒還故道時伊府典模廢法不軌暴
侵民利宮室服御一切奢僭有司懼中以旤莫敢覺
發公曰吾奉天子命秉節鉞出鎮一方此而不言
謂執憲何迺抗疏以聞竟案如法民始帖席辛酉陞
刑部右侍郎尋轉吏部右侍郎明年晉刑部尚書時
分宜任子事敗衆以 上意叵測未卽深議公獨議
遣戍中外稱快頃之改都察院左都御史首條六事

悉以時弊嘗三會銓部大計羣吏不以私庇一人
亦無敢于以私者乙丑上程書得晉秩資政大夫廕
一子入冑監賜金帛羊酒寶鏹而公之祖父母父母
並得誥贈公自是益思奮勵以報國恩會有訾之者
迺嘆曰嗟呼吾日求遠毀而毀至是無以信于人也
因力懇放還鬚髮直黝然耳帳飲都門觀者嘖嘖方
以公辭榮釋累歸享遐齡乃竟以寒行犯露致疾疾
革顧謂諸子曰吾不起矣省已無所忤獨負聖朝無
以報耳爾曹勉之語不他及是爲嘉靖丙寅十一月
廿七日詎其生弘治己未九月一日得年六十有八

公天性峭直正色不阿以是操已亦以是責人以是
告鄉亦以是立朝固不免有忤然終無得而瑕指者
公之尹蕪湖也蕪湖人勒石頌德其去河南也河南
人泣而攀轅不得則祠事之數歷三十餘年功闕章
章顯矣藉令摘發分宜得如制伊藩則流毒必不深
饗公之利豈不弘多也至若開關入民疏寢河役其
所活民命豈一家一人比耶余聞公爲士時嘗慨然
慕范文正張忠定二先生曰吾人事業當如此斯言
殆庶幾哉所著有臨溪奏議臨溪存稿內外家訓凡
若干卷藏于家

都御史潘恭定公恩傳

王世貞

萬曆之十年壬午十月十六日都察院左都御史笠
江潘公卒於家其明年癸未巡撫都御史郭公思極
以訃聞 上震悼賜 諭祭者二遣官營葬贈太子
少保已而 命翰林臣考公行 錫之謚曰恭定明
興大臣得謚恭定者僅故大司徒年公與公而兩年
公故嘗宣力泰順間屹屹砥柱者也法所謂敬順事
上純行不爽公於年公有光而 天子之制命與祭
先後辭褒揚公材德政術不啻稱是中外聞而歎言
之於是公之子學憲君允哲方伯君允端將以某月

某日葬公 賜塋伐石以俟鉅公大人之誌若銘而屬世貞狀其事以備采公諱思字子仁別號湛川已更號笠江其先毘陵人至元季有添二公者避兵徙上海遂爲上海人添二公生靜庵公某某生端原公麟仕爲所大使麟生默軒公慶多行陰德信然諾有鄉里稱以公貴贈都察院左都御史有二子其季爲頤菴公奎負幹用仕爲項城尉課最當遷自免歸頤菴公始娶於趙天繼娶錢乃生公嘗拜公封爲按察僉事而錢先逝贈宜人矣最後頤菴公復拜公贈爲左都御史錢亦爲夫人而公復爲趙力 請贈如錢

公生而明穎凝重離襁褓卽不妄言笑宛若成童六歲父教以四聲高下揚抑不兩日而悉之稍長受經術所構制科義蔚斐有聲補邑博士弟子試輒屈其曹偶無何臺試第一且廩而屬有諸生當貢而居喪服除者必廩而後貢公憫其老推以予之嘉靖壬午公年二十七舉應天鄉試第九人明年登進士甲科授郴州知州州歲當均賦公至未幾爲正冊籍清弊覈隱戶無匿田田無匿稅叅伍新舊衷而濟之高下稱平其吏民故朴魯兩造之頃不數言而決成搏頰稱快以去當入覲用治行異等調劇得禹州州故悍

王國也有子侯豪戚環衛之屬而其俗亦強侈既聞
公治初名稍稍歛跡而公一切以寬平處之獨謝絕
居間亡所徇其人大服至爲語曰毋相讐避潘侯母
甚口愧大守公在禹未幾而積貯爲列城最會歲侵
發庾而貸之無飢者尋擢南京刑部員外郎吏民思
公謳謠不已至生祀之遺愛祠以配鄭上卿公孫僑
漢丞相故潁川守黃霸語見州志中爲南刑部一歲
所而以錢夫人憂歸滿三歲服除得刑部員外郎時
天下當鄉試而執政者新議更其制以爲不當以
取舍屬監試御史特遣京朝郎往而公用文高首

傳河南所拔多知名士初少傅郭公朴尚書劉公自
強魏公尚純侍郎喻公時至與公並貴八座聲稱相
埒程式文亦以爾雅爲諸方冠還署之亡何遷廣西
按察僉事提督學政廣西故僻而推於訓故外亡所
嬾習公乃增益稅文所先者啓之而其要歸在於敦
本實貴器識以故自公後薦南宮者不虛歲而名臣
亦間出時靖江王驕勒其國衛卒之子弟毋得充諸
生卽充諸生而試者必以賄不則銀鏹其父若兄公
謂立賢無方非耶移文長史司謂王復勒諸生試者
吾立論紕汝王聞之悚然諸生乃獲試而公嘗署按

察篆又以勾捕王所匿大猾必得乃已王滋銜之其後竟以與御史監司競而上疏首誣及公上為遣給事法曹緹校置獄勘公亡所侵王奪祿國臣以下抵罪公之視學政居職自稱諭於前後數公而其攝廉察篆尤亡害考最遂進四川布政使司左叅議分守川東西北三道所至督有司輕平其徭賦察見寃滯其理所在憐人尤德之遷山東按察副使巡察海運所部登萊饑郡邑亡見庾民習巡徙抱鼓聞作公多方設法勸募賑貸之因借其力以闢荒蕪乃嚴約束布耳目民方見以畏懷有生色而御史檄公監試

事錄成進御而時相有修券於御史者摘其語以為譏訕詣逮御史及提調監試臣者遂及公時傳上怒甚且叵測公曰上明聖詎忍以語言寘人死且上也即死之而生之母非德也我安敢避而又何所覲焉已入獄寘對公自若赦出獄亦自若謫廣東河源尉沿檄歸覲願菴公道轉贛州府推官丁願菴公憂歸服除補福州府亡何轉南京太僕寺丞再轉南京禮部祠祭郎中復為江西按察司副使整飭贛州兵備兼分巡嶺北道公既坐無妄謫而資歷久亡出其右者以故自河源尉四轉而復守故官臚鞅錯

於道席不及暖公亦不及有所設施而縉紳先生不能以聲色窺公而益信其為公輔器公之在贛屬峒寇漸平遷浙江左叅政分守杭嘉湖道方按部海鹽而島寇猝至圍之數十匝時城無見兵公鼓舞吏人晝夜睥睨間不少懈賊知不可破乃解時謂鹽官孤城非公在魚肉矣而公進雲南按察使未上擢江西右布政使居無何遂遷浙江左布政使凡三轉而始為政首革賊吏出納之弊郡邑來上賦者如寄已而其民洞知之郡邑亦不得緣是而取其羨又數佐其臺使者禁斥貪墨浙人稱便復提調試事所得知名

士逾於山東時入覲與太宰都御史杭辨賢否多降心從公甫竣事擢都察院右副都御史巡撫河南下車問父老間左所疾苦得黃墨綬以上不職狀輒移文顯責之至有望風解綬去者徽恭王托玄修盡上而子庶人載堉繼之益為伎嘗輕行去其國以覘留都又多掠良家子充後官占民田所賊殺無辜數十百事聞下公公與御史悉發其狀論廢徙皇祖陵削其國秩盡奪所占還民徽既失國伊庶人復為伎伎甚於徽公首鍛其鋒剪厥羽翼其後竟後罪豫州部稍稍息肩矣公嘗整礦卒付裨將將之以赴島

寇有功與賜金幣亡何遷刑部右侍郎尋擢南京工部尚書公至扁其中堂曰敬義以示僚屬日事君而思見利而思思過半矣卽權蕪湖龍江兩稅者陷於蠹不自拔公乃擇敏慎郎與之衷畫一而著甲令焉務以不苛取而國課亦自足督修皇祖陵及孝陵又完上以其速而能節也家之賜白金爲兩者二十綵幣二有副名爲刑部尚書時吾郡人督留餉都御史章公煥故嘗有疏以經畧中原名觸上諱坐他事逮而詔法請究所由將坐以誹謗公謂章非所宜言然其意在憂時耳巡撫雲南都御史游公

居敬將征東川夷補兵餉不能無擾而與征南沐將軍相觥沐將軍中之亦坐逮將坐以擅興激變公謂游特行事不當物情耳事取旨非擅興夷狡不良不爲激變二公雖竟遠戍然得不死而上仁明亦不以爲公累也改都察院左都御史公疏辭有旨卿老成端肅風紀重任特茲簡用宜承朕命不允所辭以二品滿三載聞上遣中官賜鈔緡羊酒予告進階資政大夫封二代錄一子入太學公自是再上疏請飭臺綱剔吏弊蘇民瘼前後幾二十條鑿鑿中款上皆嘉納之命所司舉行大風霾上疏自列不

允借太宰考察庶官評薦必以公論卽分宜尚在事
不能有所下上其指一時凜然稱肅克 廷試讀卷
官是時方伯君成進士爲刑部郎以材調禮部而給
事中某欲借以傾太宰而遂及公公復上疏自列
上念公春秋高優詔許致仕而特爲太宰明所以遷
方伯君意公旣歸闔門養戚重顧生平無他嗜獨嗜
書晚而彌篤未嘗一日釋卷自六經子史以及國家
典故毋論金匱石室之藏卽虞初小黃衣所纂靡不
手錄而彙之一室蕭然唯圖書自環而已詩根抵東
京郭中間及開元大曆文則規摹昌黎六一以上沿

先秦要而歸之六經純如也始擢第而贊所業於
先生陸文裕公深陸公高自標許意不可一世士而
獨心折公語人曰文不在茲乎吾何敢居先達焉公
旣位日尊名日益重金石之辭浣陵谷者不得之身
毋以瞑不得之父兄毋以子弟於是爭趣公公不忍
逆距其意咸有所撰述以故晚節其文益富暢而有
法性孝友其事順菴公與錢夫人備志物之養喪葬
祭饗戚易不偏勝時公旣得老而諸弟溫州君惠刑
部君忠光祿君恕皆相繼自引歸三君故嘗受公經
以至有官秩公業八十餘則其最少者亦七十爲築

四老堂於第西疏泉種竹備林泉之致而學憲方伯及公少子都事允亮間休沐歸省侍公出則金紫銀艾相絡繹處則懸曲旃奏鍾鼓懽譙彌日亡間人謂洛中者莫非一姓而陸賈李遷哲之儔要以酒食選耳蓋於公無擬也公念有餘田首捐以供諸墓祭歲時合宗族饗之因以稍賙其貧者良者而扶其不幸者又推以助里甲之應供者他所著家訓井井蓋不特潘氏規而已公之歸臺使者無歲不慰薦上未及用而最後謝中丞登之溫侍御如玉復以公應詔上老之特詔進公一級公前是以詔恩當爲資

德大夫至是爲榮祿大夫今上之六年復以詔恩有司具幣餼存問時人益榮之公素強無疾又善玄素之術能攝精氣時時遡腦顧猶陋之與方外客還往相與覲析葛稚川鄧之學謂丹砂可化而人見其耳目聰瞭步履矯健以爲卽亡論冲舉可不死矣而會允亮卒公猶能強自抑已而刑部君復卒公乃歎曰四體也而廢一將奈何且使我蹣跚人世乎自是多忽忽善忘尋感脾疾月餘而逝矣距其生蓋弘治之三月二十六日也享年八十有七公爲人廣額豐下修眉秀目丰度凝雅淵渟山峙望之而知其爲貴

人也生平無喜媿色卽倉皇迫之而不能得其縻步
疾辭與人處坦夷不設城府尤不喜爲脂韋翫骹室
無雜榻囊鮮餘刺以是竟其身居官奢取予當得代
輕舫垂蠹而恒秘之曰我何以示人廉隱惻懇至以
求便利民尋推不自居曰我何以示人惠自其長藩
臬至八座多悍相宰鑄日人謂卽不相齟何以能庸
公不知公韜光善藏不激不隨有以庸之也善乎孫
支恪公之稱曰吾在銓諸藩臬之長未有不通問者
獨不能得潘公一刺異哉能不通問者必其不受問
者也公之鄉有少師徐文貞公宗伯陸平泉公者其

言著蔡也徐公謂公學自濂洛行則曾冉自通籍以
至懸車出入險阻跋蹠萬里蠻烟瘴雨之途靡所不
歷間以微絰嬰制禁都官柝楊之味靡所不嘗竟能
保躬完名出險就夷鴻猷懿烈爲賢士大夫所推重
陸公則謂公長者淳實居身廉靖鮮銜飾以暴人耳
日而其中介介不可犯猥濫請謁者望風屏跡一時
朝士皆憚服公以爲前後居中執法者罕公若也人
以爲公實錄夫漢興御史大夫與丞相侂埒重也其
可屈指數者周大夫昌之彊力貢大夫禹之清直薛
大夫廣德之敢言尚矣公不必盡有其跡而視身執

行從容養重進而議於朝退而儀於野者又何多遜也
也蓋余嘗按部汝南過太康之墟而感於先朝之顧
大夫佐者行業著於耳目而名實不被其身上書請
之朝得贈少保謚端肅縉紳頗快之夫以顧公之賢
任職百餘年而始見伸然而問其家僅一牧豎子耳
不能名其祖與今所被之盛公甫捐館而中丞請之
宗伯覈之不踰時而諸典具備毋論公之壽考福履
其子孫抑何蕃且賢重也然則造物所培覆不可銖
量寸計也已

太子少保都察院左都御史贈太子太保葛端

肅公守禮神道碑銘

于慎行

公諱守禮字與立別號與川濟南德平人也大父恂
正公智父林塘公環並用公貴累贈戶部尚書左都
御史太母張累贈夫人母某累封太夫人林塘公四
子公其長也少遊諸生聲稱藉甚年二十餘當嘉靖
戊子舉山東省試第一明年己丑第進士授河南彰
德府推官察能名入以年不及格擢爲兵部主事守
山海關報滿還部丁外艱服闕當事知公才名將改
銓曹力辭不就乃改禮部稍遷至儀制郎中于寅擢

河南提學副使乙巳轉山西叅政分守汾州遷本省
按察使歷陝西左右布政使庚戌入覲卽拜都察院
右副都御史巡撫河南明年辛亥以虜警飭邊召爲
戶部右侍郎總督宣大糧儲事竣還報改歷吏部左
右侍郎在部四年三攝太宰 世廟嘗對近臣稱爲
忠清有聲已遷南京禮部尚書丙寅關西地震九卿
自列公得致仕一日 世廟問公安在左右以老對
時年甫五十餘未老也 穆廟卽位用廷臣交薦起
爲戶部尚書居三月以太夫人年高疏請歸養內艱
服除廷臣又交薦公起爲刑部尚書至數月改都察

院左都御史掌院事越二年壬寅二品考績再受
書又二年甲戌年至請老 上雅知公清望舊臣特
詔不允乙亥六年滿考又再奏書謂臣年過七十考
績至部法難議覆因堅臥不出乃晉太子少保賜乘
傳歸里詔長吏歲致餐米以徭卒給事自隆慶以來
六卿謝事蒙恩未有其比也踰年廷中會推太宰猶
上公名已而遂卒訃聞 上爲軫悼贈太子太保賜
謚端肅遣官治塋守臣稱制臨祭者三皆備物也公
爲人器宇端凝風神道勁被服造次必於禮法世俗
聲色貨利一無所嗜而不肯匿情飾貌以博名聲當

官守法務在鉏抑疆梗惠利小弱而不爲瑣細科條
傷於苛急居常踈踈簡默言不出口及當大議大謀
衆莫敢發公獨守經據古侃侃指畫常以片言取決
平生取予去就嚴於一介至臧否人物常依寬大恥
爲刺深蓋老成正直君子也初舉於鄉長吏約三老
子弟釀金爲駕力謝弗受至請其籍焚於廷識者重
之司理彰德部中有大盜覺株連士族數百家以修
宿怨且圖自解監司使公覆訊再三鉤核具得情實
悉諭出之其守關也海西夷人闌出禁物及邊邑豪
市馬皆禁止如令朝鮮貢使以故事有所獻遺公力

卻之曰封疆之吏禮無私交使者拜謝而去還白國
王王爲立坊界上以頌其美有羽林列校詐稱遊徼
所過橫索吏毋敢問公詰得奸賊卽移牒都官致之
於法輦下肅然其郎儀制也代府三王以宗人奉祠
夤緣請封行萬金賂貴近皆已報諾金吾調得其藉
獨無公名問其奏使對曰郎中執法凜凜不敢以私
請耳鴈門塞上有晉府牧地爲居民所占王遣田官
主之民嘯聚數百人賊傷田官與王家訟不決公訊
其首亂者置之法而使吏賊其租代送王家于與民
皆不失田而亂因止秦府亦以牧地占民田立石隴

上公使仆其石告以晉事田亦歸民韓府貧宗大譟
會城官府晝閉公時爲右使至前曉譬約以國法立
爲調均所適以便宜假貸宗人感謝解去左使入覲
藏吏奉羨金爲裝公叱不內吏白此故事也卽公不
內後人亦當有之公怒曰爾安知後人非賢者籍而
置之帑天官課郡國治狀陝部小吏有署老疾當罷
者公爲請留尚書曰計簿出自藩伯何自忘也公曰
此邊吏去省遠徒取文書登簿今見其人方知誤註
過在布政何可使小吏受枉尚書驚服曰誰能於吏
部堂上自實過誤卽此可爲賢能第一矣嘉靖末年

嚴氏柄國廷中又多貴寵賄賂公行天下傳方岳入
覲不齎金錢餽遺及爲吏部主計扃門不受謁自葛
公以外指不多屈非虛語也公佐吏部屬太宰缺柄
國者意有所屬以上旨諭部公弗敢從而以周公
延名上及調旨別推復申前囑公又不從而以屠公
僑名上此兩公皆當世清正臣也在列環聽無不悚
服而公以是南遷罷矣 穆宗卽位大發帑金賜九
邊將士朝議以爲邊吏卒多老弱不任兵可因受賜
時簡閱因而汰之此省費實士伍兩便公曰不可將
士守邊暴露幸蒙大賚亦欲邀分寸之澤乃因而汰

之是以鉅萬金賈怨也傷明主恩厚且生事端執

政深服其言乃止其掌臺正數上疏條畫振紀綱禁

侈靡令御史行部申明憲典毋得輕信告誥有所侵

寃凡四計內外吏務在綜核名實裁抑僥倖尤重貪

淺之禁萬曆初政所風厲紆虔有先朝風多公謨畫

云武岡王以近屬攝國陰結內主謀奪楚王之孤太

妃與兩臺奏數格不行公廉得其使行賄長安者劾

論如法遂罷武岡歸府而王孤有國矣曲阜世以孔

氏為令時有不勝任者朝議改設流官公曰祖宗承

前代故事褒崇聖裔藏在盟府即其人不職當擇賢

皇者易之何至廢數百年盛典遂復世職如故其論事

引大體持正類如此自為正卿歷事三朝一意奉法

孤立無所阿曲正色直氣望之儼然所遇二三權相

皆析節下公公終不為小巽既以少宰拂嚴氏罷去

及起為戶部而華亭新鄭構卻舉朝奏排新鄭獨公

無疏又拂華亭及新鄭再相修怨華亭至欲戍其子

弟公又從中主持得從報寢新鄭固已嫌公弟念其

德厚忍未有以發也及新鄭賜罷廷中有所推鞠呵

語連及禍且不測公又以危言激悟江陵下朱金吾

雜治其事乃解二公聞知皆心服矣家居奉事二親

孝誠備至與諸弟同爨幾數十年教諸子孫馴謹有
法於故人子弟鄉曲貧乏調護尤厚待之色笑溫然
不爲崖異人無小大交口德之病則羣禱沒則行哭
其中心誠信所感也居常坐臥一樓撫獵經史手自
斷注所著有靜思稿及奏疏家訓若干卷行於世公
生弘治乙丑二月十二日卒萬曆戊寅正月二十日
得壽七十四歲始公爲郎時病而夢謁帝命曰以彰
德獄事增壽三紀至是果符其數云

御史大夫李敏肅公世達傳

澹園集

敏肅公諱世達字子成號漸菴晚更號廓菴關中涇
陽人生而穎異日誦千言自其髫年卽具博大之器
卓犖之識一時薦紳先生咸器之年十二督學使者
殷公置高等補博士弟子員尋爲方伯楊恪愍公所
知諸所崇禮備至西安守石州胡公甫下車見而奇
之與爲忘年之交當是時已瑩精大道孔孟根宗伊
周事業日在寤寐中嘗夢謁高皇帝帝授明珠一
命曰善自珍之異日當爲國寶也年十九登嘉靖壬
子賢書丙辰成進士授戶部主事癸亥調吏部考功

司主事已調文選以養病歸隆慶改元起陞稽勲員外郎未幾調考功戊辰陞本司郎中調文選丁曾大父憂三年起陞膳黃通政給假回起陞南太僕卿今上改元陞右僉都御史巡撫山東陞右副都御史總理河道戊寅以原官巡撫浙江旋告病復以原官起總督漕運兼巡撫鳳陽甲申陞南兵部右侍郎改戶部是歲陞吏部左侍郎丙戌陞南吏部尚書改南兵部尚書叅贊機務乙未爲刑部尚書改都察院掌院事左都御史壬辰以六年滿加太子少保癸巳乞骸骨歸奉旨馳驛養病萬曆己亥卒年六十有七訃

聞 上震悼久之賜諭祭謚敏肅始公在戶部監兌湖湘旦暮竭心計佐度支之急前後入銓司佐黜陟品藻人羣百不失一會大計當事者拱手聽裁卽見斥者無不心服以去時徐文貞公在柄地而秉銓者爲嚴文靖公公與陸莊簡公同爲司屬得以揆揚側陋薦進之往往從田間躋華廡列卿貳銓局之公流聞宇內前後所未有也其開府山東議班操蠲積逋減馬價著爲挈令時蔣大爵范儒以明經舉安廷璞李遐齡以知印擢楊果趙蛟以都吏進而白東阿朱萊陽一桂吏議又力昭雪之不以身格爲軒輊也膠

河議起公身履其地相士宜權經費所為條析利害甚具東土不至勞民傷財為大役累公之功多矣戊寅改撫浙江不數月公疏辭疾引退者八年起督漕河念寶應湖險惡歲漂舳艫無算為請開越河殺水勢列五款以上綱領節目犁然畢具其年而竣比原估料價省費一萬有奇晉南太宰與海忠介公意氣相期擔荷國事所甄敘羣品如矚肩睫大察汰遣數百人下逮輿臺無不悅服者入為大司寇章數十上無非平允詳慎務廣上好生之德時上惡邊臣偽增首功怒至不可解公劑於輕重之間以定厥罪

而比附重辟執不奉 詔卒出其人於必死之地真回天力也會密遣嚴校偵部事公慮敵實不可去屢疏明非體乞亟罷去 上改容謝乃已權璫憑藉威靈勢張甚在事諸臣莫敢誰何公具疏先革其禁近供事徐正罪以杜禍原是又發官闈所未發之奸而開廷臣所不敢開之口已御史職雄俊所抨擊無與抗者往臺長不甚有所甄別公謂吏治日衰民生寡遂皆職此之繇乃舉回道考察例行之斥韓介劉瑜黃正色輩五六人臺中始悚然改觀易慮一以奉公為急且申明憲典傳布天下俾撫巡無得以間餽相

加遺所薦下吏亦無得執贄及門違者論如法於時
道路風清苞苴弊絕嗚呼盛矣公正以裊躬忠以徇
國不難以一人排羣議觸忌諱侃侃然貞而不激通
而不隨宏而不疏細而不窳獨斷於是非襍遯之中
抗色於傾側危疑之際國事既濟身名亦全誠可謂
臣主相遭千載一時也詳見奏議八卷

論曰孔孟論學莫急於知人蘇子瞻乃謂蕭何知韓
信非有術而可學何其謬也李公膺懷洞達無所不
茹納卽窮鄉下吏片長寸善或舉以告公無不知者
此豈得之性哉呂聖功爲相於四方替罷謁見者必
問地方人才容去隨疏於籍故朝廷索才如取之橐
然譬之良工構室棟梁榱桷小大畢獲誠儲之素也
余見公數巨冊人才臧否良楛種種皆具惜夫未正
冢卿之位而公去然其及於世者亦豈微也哉公公
忠體國得大體雖其不悅者亦無所傷云

